

Ontdekkingsreisigers in Afrika

Kan jy glo daar was 'n tyd – lank, lank gelede – toe mense nie eens geweet het hoe die hele aardbol lyk nie? Hulle het nie [teleskope](#) of [satelliete](#) gehad waarmee hulle uit die ruimte na die aarde kon kyk nie, en niemand het al 'n [wêreldkaart](#) geteken met al die **kontinente** en oseane daarop nie. Die enigste manier vir mense om uit te vind hoe die wêreld lyk en om dit te **karteer** ('n kaart daarvan te teken), was om op 'n **ontdekkingsreis** te gaan en dan terug te gaan huis toe met inligting oor waar die plek is en wat 'n mens alles daar kan sien en doen.

Eintlik is dit nie korrek om te sê dat enige wêrelddeel “ontdek” is nie. Daar word veral wyd aanvaar dat [Afrika](#) die “wieg van die mensdom” is, met ander woorde dat die eerste mense op aarde in Afrika gewoon het.¹ Afrika was dus van die begin af bekend, mense het net weggetrek en oor baie eeue vergeet hoe Afrika lyk. As ons in hierdie artikel na “ontdekkingsreisigers” verwys, praat ons dus van mense wat uit kulture gekom het wat nie meer kennis van Afrika gehad het nie.



Die Antieke Era

Die Fenisiërs ('n volk wat al 'n millennium voor Christus geleef het) was goeie seevaarders en het toe al 'n kolonie met die naam van Kartage (Engels: Carthage) op die noordelike kus van Afrika gevestig. Daar word beweer dat hulle die eerste was om met 'n skip reg rondom Afrika te vaar, 'n reis wat ongeveer 600 v.C. sou plaasvind. Hulle het ook sterk handelsbande met die volke in die binneland van Afrika gehad. Navorsers vermoed hulle het die ooskus van Afrika tot by die Horing van Afrika (die huidige Somalië en Ethiopië) baie goed geken.²

Afrika was ook deel van die Romeinse Ryk. Die Romeine het die gebiede suid van die Sahara verken om **handelsbetrekkinge** met die Afrika-koninkryke **aan te knoop** (te begin; te skep). Hulle het ook handelsroetes uit die binneland van Afrika na die [Middellandse See](#) geskep sodat goedere direk na die drie belangrike Romeinse handelsentrums op die Noord-Afrikaanse kus, Leptis Magna, Oea en Sabratha, vervoer kon word.



Die vyf Romeinse ekspedisies na Afrika se binneland is gelei deur die volgende ontdekkingsreisigers:

- **Cornelius Balbus** (19 v.C.)
- **Suetonius Paulinus** (41 n.C.)
- (50 n.C.)
- **Valerius Festus** (70 n.C.)
- **Julius Maternus** (90 n.C.)³



Die Arabiere

Die Arabiere het tussen 600 en 700 n.C. die noordelike dele van Afrika (ook bekend as die **Maghreb**) binnegeval en oorgeneem. Van daar af het hulle in kontak gekom met Afrika-koninkryke.

Vir ongeveer 1 000 jaar was dit hoofsaaklik die Arabiere wat in Afrika se binneland handel gedryf en hul geloof ([Islam](#)) onder die Afrikane versprei het. Die Arabiere het [goud](#), ivoor, wol, skulpe en was (in Engels *wax*) uit Afrika na Arabië geneem, maar die belangrikste handelsproduk wat hulle uit Afrika gekry het, was slawe. Baie navorsers glo vandag dat Afrikane hulle tot die Islam bekeer het om te **verhoed** dat hulle as slawe verkoop word.⁴



Ibn Battuta

Oor die eeue heen was daar 'n hele paar belangrike Arabiese ontdekkingsreisigers, maar die bekendste een, wat veral vir sy reise in Afrika **bekendheid verwerf** het, was Ibn Battuta.

Hy is in Marokko gebore en het reeds in 1325, toe hy net 21 was, sy eerste reis onderneem - die tradisionele **hadj** (pelgrimstog) na Mekka.

Sy tweede reis was al met die ooskus van Afrika tot by die hedendaagse Tanzanië.

Later in sy lewe het hy gereis tot by Mali in Wes-Afrika, 'n baie ryk en invloedryke koninkryk in daardie tyd.

Sy belangrikste **nalatenskap** was 'n geskrif met die naam van *Rihla*, waarin hy sy waarnemings oor Afrika opgeteken het. ⁵



Ibn Battuta

Die Europeërs

Die Era van Ontdekking

Nadat die Romeinse ryk in 5 n.C. tot 'n val gekom het, het die hele Europa in 'n donker tyd verval waarin daar min vooruitgang was en waarin kennis en die wetenskap min aandag gekry het. Hierdie tyd was bekend as die **Middeleeue**. [\[Lees hier oor die Middeleeue.\]](#) Eers met die **Renaissance** in die 1400's was daar weer 'n **opbloei** (nuwe lewe; groei) in die kuns en die wetenskap. ⁶ [\[Lees hier oor die Renaissance.\]](#)

Die Renaissance het ook gelei tot 'n nuuskierigheid oor die wêreld waarin die **Europeërs** (inwoners van Europa) hulle bevind het. Konings en navorsers, sakemanne en seevaarders, **filosowe** (denkers) en avonturiers uit Europa het ontdekkingsreise onderneem om die wêreld te verken. Dit was 'n tydperk waarna ons vandag verwys as die Era van Ontdekking (in Engels: Age of Discovery; Age of Exploration; Age of Encounter). ⁷



Jy sal dalk bekende name uit hierdie **era** herken soos [Christopher Columbus](#), Ferdinand Magellaan, Marco Polo, Ponce de Leon, Hernando de Soto, Amerigo Vespucci (na wie Amerika vernoem is), prins [Hendrik die Seevaarder](#) en sir Frances Drake. Hulle was almal óf self ontdekkingsreisigers, óf hulle het die ontdekkingsreise **gefinansier** (betaal). ⁸



Eers die seeroetes

Die Europeërs het darem geweet dat die hele wêreld nie net uit Europa bestaan nie. Die [Syroete](#) (in Engels: Silk Road) het byvoorbeeld al eeue lank bestaan. Dit was die roete waarlangs nie net sy nie, maar ook speserye, tee en porselein uit die Ooste na Europa vervoer is.

Die probleem met hierdie roete was dat dit meer as 6 000 km oor baie **onherbergsame** terrein gestrek het. Die enigste manier om die handelsware te vervoer, was met kamele. Dit het beteken enigiets wat Europa toe gegaan het, moes op 'n kameel se rug kon pas. Iemand moes die **handelsware** ook die hele tyd oppas anders het rowers dit gesteel. Handel op hierdie manier was nie net duur nie, maar ook gevaarlik en **tydrowend**.⁹

Dit was vir die Europeërs noodsaaklik om 'n nuwe roete tussen Europa en die Ooste te kry waarmee handelsware vinniger en meer **doeltreffend** vervoer kon word. Die maklikste oplossing was om 'n seeroete te kry sodat hulle die handelsware met skepe kon vervoer. Die **voor die hand liggendste** roete was die een om Afrika.¹⁰

Hendrik die Seevaarder, prins van Portugal, het in die 1400's seereise teen die weskus van Afrika af begin finansier. Hy was geïnteresseerd in skeepvaart en **navigasie**, en hy het geglo dat die invloed van die Moslems op wêreldhandel beperk moet word. Met sy hulp het Portugese seevaarders die weskus van Afrika verken tot by die land wat ons vandag as Gambië ken.

Die volgende Portugese koning, Johannes II, het Hendrik se werk voortgesit. In 1488 het [Bartolomeu Dias](#) die suidpunt van die kontinent opgespoor, en in 1498 het [Vasco da Gama](#) om die Kaap tot in Indië gevaar.

Christopher Columbus het in 1492 probeer om 'n ander roete via die [Atlantiese Oseaan](#) tot by Indië te kry, maar hy het per ongeluk op Amerika afgekom. (Aanvanklik het hy gedink hy is in Indië, dis hoekom die eilande waar hy geland het as die Wes-Indiese Eilande bekend staan.)¹¹



Christopher Columbus-monument, Barcelona

Afrika se binneland

Die Europeërs het Afrika lank beskou as 'n hindernis waarom hulle moes vaar as hulle die Ooste wil bereik. Hulle het nooit regtig aan Afrika as 'n belangrike plek gedink nie. Die Sahara het dit moeilik gemaak om die binneland van Afrika uit Europa te bereik. Dit was net so moeilik om met 'n skip aan die kus van Afrika vas te meer en aan wal te gaan, want die see was rof en die winde woens. Die Europeërs was dus lank tevrede daarmee om 'n paar handelsposte rondom die kus van Afrika op te rig sodat hulle die skepe op die handelsroete na die Ooste kon ondersteun. ¹²

Eers in die 1700's het die Europeërs Afrika se binneland begin verken omdat hulle nuwe handelsmoontlikhede wou ontgin. Dit was belangrik om Afrika se riviere te karteer, want handelsgoedere is hoofsaaklik met skepe op water vervoer. Onthou dat daar in daardie tye nog nie paaie of spoorlyne was waarlangs 'n mens goedere kon vervoer nie. ⁹

Hierdie nuwe belangstelling in Afrika het beteken dat Europeërs nou reise in Afrika begin onderneem het sodat hulle kon bepaal hoe die kontinent lyk en wat daar aangaan. Dis eintlik hierdie **ekspedisies** in Afrika waarna navorsers en geskiedenisboeke as “ontdekkingsreise” verwys, en die leiers van die ekspedisies is die “ontdekkingsreisigers”.

Ons bespreek die vernaamste ontdekkingsreisigers hier in **chronologiese volgorde** van hul reise deur Afrika.

James Bruce

James Bruce, 'n Skot, is in 1763 as die Britse konsul in [Algerië](#) aangestel. In 1768 het hy op 'n ekspedisie vertrek om die oorsprong van die [Nylrivier](#) te vind. Ten spyte van moeilike omstandighede en politieke onrus in Ethiopië, het hy die Tanameer, waar die Blou Nyl ontspring, in November 1770 bereik. Die terugreis was net so moeilik, maar hy het in 1774 weer in Londen aangekom, waar hy 'n boek, *Travels to Discover the Source of the Nile*, oor sy **wedervaringe** geskryf het. Mense wou hom **aanvanklik** nie glo nie, maar latere reisigers het bevestig dat sy vertellings korrek was. ¹³



James Bruce

Mungo Park

In 1788 is The African Association in Brittanje gestig. Die doel van hierdie organisasie was om ontdekkingsreise in Afrika aan te moedig. Die eerste inligting wat hulle wou hê, was oor die Nigerrivier, 'n groot rivier in Wes-Afrika. Hulle het van die rivier geweet, maar nie geweet waar hy ontspring, waar hy uitmond, of in watter rigting hy vloei nie. ⁹

Mungo Park, 'n jong Skotse dokter, het in die Oos-Indies en in Sumatra naam gemaak as 'n wetenskaplike. In 1795 het die African Association hom Afrika toe gestuur om die inligting oor die Niger te kry wat hulle wou hê.

Park se reis was nie maklik nie. Hy is amper dood aan koors, hy is beroof, die meeste van sy helpers het hom verlaat, en 'n Arabiese hoofman het hom vier maande lank gevange gehou. Maar hy het wel die Niger bereik, bepaal dat dit ooswaarts vloei, en toe in 1796 teruggekeer Brittanje toe om hierdie nuus met die Association te deel.

Sy boek *Travels in the Interior Districts of Africa* het hom beroemd gemaak. ¹⁴



Mungo Park

René-Auguste Caillié

Caillié was die eerste Europeër wat die stad [Timboektoe](#) bereik het en die reis oorleef het. Die **gerugte** (stories) in Europa was dat dié stad geheel en al van goud was, maar Caillié het die stad in 1827 bereik en bevind dit was 'n gewone stad met moddergeboue!

Hy het hom soos 'n Arabier vermom en met 'n **karavaan** ('n groep kamele) oor die Atlasgebergtes tot in Tangier gereis, en van daar af teruggevaar Frankryk toe.

¹⁵



Heinrich Barth

Barth was 'n Duitser wat in 1850 saam met 'n Britse ekspedisie vanaf Tripoli deur die Sahara na die binneland van Afrika gereis het. Sy Britse medereisigers is langs die pad dood, en hy het die hoof van die ekspedisie geword. Hy het tot by die Tsjadmeer en die Benueerivier, en van daar af tot by Timboektoe gereis. Hy was die eerste Europeër wat die middelste gedeelte van die Nigerrivier behoorlik verken het. Die reis het uiteindelik meer as 16 000 km **beslaan**. Toe hy in 1855 teruggekeer het Europa toe, het hy vier (van vele) boeke oor dié gebied geskryf wat vandag nog 'n ryke skat van inligting bevat. ¹⁶



Heinrich Barth

Richard Francis Burton

Burton was 'n **waaghalsige** reisiger wat homself onder andere soos 'n Moslem vermom het sodat hy Mekka kon besoek - iets wat 'n nie-Moslem nie mag doen nie. In Somalië is hy met 'n spies in sy **kaak** gestek. Dit het hom nie afgeskrik nie. In 1857 het hy en John Speke na die oorsprong van die Nyl begin soek. Ongelukkig het hy baie erge **malaria** gekry, en toe hulle uiteindelik by die Tanganjikameer aankom (aan die westekant van die huidige Tanzanië), was hy so siek dat hy moes teruggaan Engeland toe. ¹⁷ [[Lees hier oor malaria.](#)]



Richard Francis Burton

John Hanning Speke

John Speke het die reis saam met Burton aangepak. Toe Burton terug is Europa toe, het hy verder noord gereis tot hy by 'n groot meer aangekom het wat hy geglo het die oorsprong van die Wit Nyl was. Hy het die meer na koningin Victoria genoem.

Burton het Speke se bevindinge **bevraagteken**, maar toe Speke in 1862 weer

terug is, het hy 'n uitvloei in die meer gevind wat hy geglo het bevestig dat die Wit Nyl in die meer ontspring. Hy het hierdie uitvloei Ripon-waterval genoem. ¹⁸



John Hanning Speke

Samuel White Baker

Samuel Baker het Speke se kaarte en aantekeninge gebruik in sy eie reis wat hy in 1863 aangepak het om ook die oorsprong van die Nyl te kry. In 1864 het hy op 'n meer afgekom (wat hy na Victoria se man, Albert, genoem het) wat hy geglo het die oorsprong was. Dié meer lê tussen die lande wat ons vandag as Uganda en die Kongo ken. ¹⁹



Samuel White Baker

David Livingstone

David Livingstone is waarskynlik die bekendste Britse ontdekkingsreisiger in Afrika. Hy het in Skotland grootgeword en is opgelei as 'n dokter en 'n sendeling. Hy was ook sterk gekant teen slawerny.

Sy eerste reis was van [Suid-Afrika](#) af tot in Luanda aan die weskus van Afrika. Sy **primêre** oogmerk met hierdie reis was om 'n handelsroete tot by die Atlantiese Oseaan te kry waardeur slawehandel **ondermyn** sou kon word.

In 1854 het hy Luanda bereik. Van daar af is hy terug na die binneland om die Zambezirivier te verken. Op 16 November 1855 het hy die enorme waterval bereik wat die plaaslike inwoners Mosi oa-Tunya ("die rook wat donder") genoem het. Hy het dié waterval ook na koningin Victoria vernoem.

Sy laaste reis het hy in 1866 onderneem, ook om na die oorsprong van die Nyl te soek. Van sy helpers het **gedros** (weggeloop) en in Zanzibar gaan vertel dat hy vermoor is. Intussen het hy in 'n westelike rigting gereis tot by die Bangweulmeer en Nyangwe, die verste wes wat enige Europeër nog in daardie deel van Afrika was.

Teen 1871 was dit al 'n paar jaar sedert enigeen iets van hom gehoor het, en die Britse owerhede het begin bekommerd raak oor hom. Henry Stanley het hom uiteindelik by die Tanganjikameer opgespoor.

Livingstone het geweier om saam met Stanley terug te keer Engeland toe, en hy het verder na die oorsprong van die [Nyl](#) gesoek. In Mei 1873 is hy in Chitambo, in die noordelike deel van die huidige [Zambië](#) aan [malaria](#) oorlede. ²⁰



David Livingstone

Henry Morton Stanley

Henry Stanley was 'n **Wallieser** van geboorte. Ná baie moeilike kinderjare in 'n weeshuis is hy Amerika toe.

Hy het eers deur die Amerikaanse Wilde Weste gereis en toe 'n joernalis by die *New York Herald* geword. Daar het hy opdrag gekry om "Livingstone op te spoor". Dit was toe 1869 en reeds 'n jaar sedert enigeen iets van Livingstone gehoor het.

Op pad na die ooskus van Afrika, het hy eers in Egipte **aangedoen** om oor die opening van die Suezkanaal te berig. Daarna is hy na die ooskus van waar hy meer as 'n 1 000 kilometer ver die binneland in sou trek op soek na sy held.

Die reis het nie goed gegaan nie. Binne dae is sy perd dood, van die draers is weg met sy voorraad, en baie van sy mense het siek geword. Sy groep is aangeval, en hulle moes selfs op 'n keer vir mensvreterers vlug!

Ten spyte van al hierdie terugslae het hy die Tanganjikameer op 10 November 1871 bereik, en daar het hy, uit pure senuweeagtigheid, sy beroemde woorde geuiter: "Doctor Livingstone, I presume?"

In 1874 is hy terug na Afrika toe om die Kongo-**bekken** (die groot stuk aarde waar die Kongorivier ontspring) te verken. Teen die tyd dat hy die Atlantiese Oseaan in 1877 bereik het, het hy meer as 10 000 kilometer oor Afrika getrek. Hierdie reise van Stanley en sy verslae oor die rykdom in die gebied het aanleiding gegee tot die Belgiese koning van daardie tyd, Leopold II, se uitbuiting

van die Kongo. ²¹



Henry Morton Stanley

Mary Kingsley

Mary Kingsley was merkwaardig omdat sy op haar eie in Afrika gereis het, iets wat vroue daardie jare nie gedoen het nie. Haar ouers is oorlede, en sy het haar eerste reis in 1893 van Sierra Leone af tot by Luanda in [Angola](#) aangepak. Sy het by plaaslike inwoners gebly, en dikwels heeltemal alleen deur die Kongo, Angola, [Gaboen](#) en Kameroen gereis. Haar opleiding as verpleegster het haar in staat gestel om siekes te help.

Gedurende haar tweede reis in 1894 het sy Berg Kameroen uitgeklim.

Sy is terug Engeland toe waar sy saam met kundiges van die Britse Museum gewerk het om 'n nuwe **spesie** varswatervis te beskryf wat sy op haar reise teëgekom het. Die vissies is uiteindelik na haar vernoem. ²²



Mary Kingsley

Woordbank

aangedoen	Besoek; stop.
aan te knoop	Begin; skeep.
aanvanklik	Eers.
bekendheid verwerf	Bekend word.
bekken	Gewoonlik die deel van die lyf tussen die heupe; ook die stuk aarde waarin 'n klomp riviere ineenvloei om 'n groot rivier te vorm.

beslaan	Dek.
bevraagteken	In twyfel trek.
chronologiese volgorde	Die volgorde waarin 'n reeks gebeurtenisse in tyd plaasvind.
doeltreffend	Op 'n'n goeie manier.
gedros	Sonder toestemming wegloop.
ekspedisies	'n Reis, gewoonlik oor moeilike terrein.
era	Tydperk.
Europeërs	Inwoner van Europa.
filosowe	Denker; iemand wat oor die betekenis van die lewe nadink.
gefinansier	Geld gee sodat iets gemaak of 'n projek onderneem kan word.
gerugte	Storie; onbevestigde berig
hadj	Pelgrimstog na Mekka wat elke Moslem moet onderneem.
handelsbetrekkinge	Samewerking sodat daar handel gedryf kan word.
handelsware	Goedere wat 'n mens koop en verkoop.
kaak	Die deel van 'n mens se gesig waarin jou ondertande sit, en wat kan beweeg.
karavaan	'n'n Groep kamele waarmee daar gereis word.
karteer	'n Kaart teken.
kontinente	Vasteland; 'n groot stuk aarde wat deur oseane omring word.

Maghreb	Ou naam vir die noordelike strook van Afrika wat aan die Middellandse See grens.
malaria	Siekte wat deur muskiete oorgedra word.
Middeleeue	'n Era tussen die val van die Romeinse Ryk en die Renaissance waarin daar min wetenskaplike ontwikkeling in Europa plaasgevind het.
nalatenskap	Erflating; dit wat 'n persoon ná die dood vir die nageslag agterlaat.
navigasie	Om 'n roete met behulp van 'n kaart of plan te volg.
ondermyn	Doelbewus iemand se werk belemmer
onherbergsame	Gesê van 'n landstreek met uiterste omstandighede waarin 'n mens moeilik woon.
ontdekkingsreis	'n Reis om nuwe plekke te verken.
opbloei	Nuwe lewe; groei.
primêre	Belangrikste
Renaissance	Die herlewing van die kunste, wetenskaplike denke en ontwikkeling in Europa.
satelliete	Stuk toerusting wat in die ruimte geplaas word waarmee 'n mens goed op die aarde en in die ruimte kan bekyk.
spesie	'n Klassifikasie vir diere en plante.
teleskope	Apparaat waarmee 'n mens baie ver kan sien.
tydrowend	'n Lang tyd vat.
verhoed	Keer.
voor die hand liggendste	Die maklikste, eerste, logiesste.
waaghalsige	Waag maklik kanse; loop risiko's.
Wallieser	Inwoner van Wallis.
wedervaringe	Belewenisse; ietsdinge wat ervaar is.

Lees meer

- [Lees hier meer oor die Europeërs se verkenning van die wêreld gedurende die Era van Ontdekking](#)
- [Die Nylrivier](#)
- [Hier is 'n interessante artikel oor ontdekkers](#)

Kyk ook hier

Hierdie video gaan oor Ibn Battuta se reise

Hierdie video handel oor die verspreiding van die Islam in Afrika en die legende van Timboektoe

Kyk hier na 'n dokumentêr oor David Livingstone en Henry Stanley

Christopher Columbus (Dokumentêr)

Die majestueuse Victoria-waterval